



Привремена заједничка комисија оба дома
Парламентарне скупштине Босне и
Херцеговине за спровођење процедуре за
именовање члана Канцеларије за разматрање
жалби

Privremena zajednička komisija oba doma
Parlamentarne skupštine Bosne i Hercegovine
za provođenje procedure za imenovanje člana
Ureda za razmatranje žalbi

Privremeno zajedničko povjerenstvo obaju
domova Parlamentarne skupštine Bosne i
Hercegovine za provođenje procedure imeno-
vanja člana Ureda za razmatranje žalbi

Broj: 01,02-50-14-389-3,7/17
Sarajevo, 6.3.2017. godine

Na osnovu člana 93. Zakona o javnim nabavkama („Službeni glasnik BiH“, broj 39/14) i člana 9. Poslovnika o radu Privremene zajedničke komisije oba doma Parlamentarne skupštine Bosne i Hercegovine za provođenje procedure za imenovanje člana Ureda za razmatranje žalbi (u daljnjem tekstu: Privremena zajednička komisija), Privremena zajednička komisija objavljuje

**JAVNI KONKURS
ZA IMENOVANJE ČLANA UREDA ZA RAZMATRANJE ŽALBI (u Sarajevu)
IZMEĐU STRUČNJAKA U OBLASTI JAVNIH NABAVKI, TRANSPORTA I
STRATEŠKOG POSLOVNOG UPRAVLJANJA IZ FEDERACIJE BOSNE I
HERCEGOVINE**

Broj izvršilaca: jedan u Uredu za razmatranje žalbi u Sarajevu

Ured za razmatranje žalbi je samostalna, nezavisna institucija sa statusom pravnog lica, sa sjedištem u Sarajevu. Ured za razmatranje žalbi rješava po žalbama u postupcima javne nabavke. Članovi Ureda za razmatranje žalbi su u izvršavanju svoje funkcije nezavisni, jednaki i vezani isključivo za Ustav BiH i zakone u Bosni i Hercegovini.

Članove Ureda za razmatranje žalbi imenuje Parlamentarna skupština BiH u skladu sa Zakonom o javnim nabavkama („Službeni glasnik BiH“, broj 39/14).

Ured za razmatranje žalbi u Sarajevu ima sedam članova, od čega po dva iz konstitutivnih naroda u Bosni i Hercegovini, jednog iz reda ostalih, pri čemu su dva člana iz Republike Srpske, četiri člana iz Federacije BiH, a jedan iz reda ostalih alternativno se bira iz jednog ili drugog entiteta.

U skladu s članom 93. stav (11) Zakona o javnim nabavkama („Službeni glasnik BiH“, broj 39/14), **mandat** novoizabranog člana umjesto razriješenog člana Ureda za razmatranje žalbi, traje do isteka aktuelnog petogodišnjeg mandata razriješenog člana, odnosno do 24.6.2019. („Službeni glasnik BiH“, broj 49/14 od 24.6.2014.)

Kandidati koji konkuriraju za člana Ureda za razmatranje žalbi u Sarajevu moraju ispunjavati opće i posebne uslove.

Opći uslovi za sve kandidate:

- da je stariji od 18 godina;
- da je državljanin Bosne i Hercegovine;
- da nije otpušten iz državne službe u institucijama Bosne i Hercegovine, odnosno entiteta, kao rezultat disciplinske mjere, u periodu od tri godine prije dana objavljivanja upražnjene pozicije;
- da nije obuhvaćen odredbom člana IX. stav 1. Ustava BiH.

Posebni uslovi za kandidate koji konkuriraju na mjesto člana Ureda za razmatranje žalbi - stručnjaka iz oblasti izvođenja radova, javnih nabavki, transporta i strateškog poslovnog upravljanja:

- visoka stručna sprema - VII. stepen ili visoko obrazovanje koje se vrednuje s najmanje 240 ostvarenih ECTS bodova Bolonjskog sistema studiranja, pravni, ekonomski, arhitektonski, građevinski, elektrotehnički, mašinski, geodetski i saobraćajni fakultet;
- pet godina radnog iskustva nakon sticanja fakultetske diplome u oblasti izvođenja radova, javnih nabavki, transporta i strateškog poslovnog upravljanja;
- stručna znanja iz oblasti javnih nabavki, poznavanje oblasti koje su u uskoj vezi s javnim nabavkama, kao što su konkurencija, javni prihodi, direktive EU kojima se reguliraju javne nabavke;

Broj izvršilaca: jedan u Uredu za razmatranje žalbi u Sarajevu;

Potrebni dokumenti za sve kandidate:

- 1) radna biografija (CV) s adresom i brojem telefona;
- 2) ovjerena kopija fakultetske diplome (nostrificirana diploma ako fakultet nije završen u Bosni i Hercegovini ili je diploma stečena u nekoj drugoj državi nakon 6.4.1992.), odnosno za kandidate koji su visoko obrazovanje stekli po Bolonjskom procesu uz fakultetsku diplomu (dodatak diplomi);
- 3) uvjerenje o državljanstvu Bosne i Hercegovine, ne starije od šest mjeseci;
- 4) dokaz o traženom radnom iskustvu u struci, izdat od relevantne institucije;
- 5) ovjerena izjava da nije otpušten iz državne službe u institucijama Bosne i Hercegovine, odnosno entiteta kao rezultat disciplinske mjere u periodu od tri godine prije dana podnošenja prijave za upražnjene pozicije;
- 6) ovjerena izjava da nije obuhvaćen odredbom člana IX. stav 1. Ustava BiH.

Traženi dokumenti moraju biti originali ili ovjerene kopije, a izjave ovjerene kod nadležnog organa, s tim da predati dokumenti ne podliježu vraćanju.

Zabrana diskriminacije: Nijedna prijava ne može biti izuzeta iz razmatranja isključivo po osnovu kandidatovog spola, rase, boje kože, jezika, vjeroispovijesti, političkog ili drugog mišljenja, nacionalnog i socijalnog porijekla, veze s nekom nacionalnom manjinom, imovinskog statusa, rođenja ili drugog statusa.

Nakon provedenog javnog konkursa, kandidati koji budu ispunjavali uslove javnog konkursa bit će pozvani na intervju. Cilj intervjua je da se utvrdi stručnost i osposobljenost kandidata za obavljanje poslova te krajnja i ukupna ocjena kandidata.

Po završetku izborne procedure, prije preuzimanja dužnosti, primljeni kandidat dostavit će ljekarsko uvjerenje o tome da je zdravstveno sposoban za obavljanje navedenog posla, ne starije od 30 dana. Također će dostaviti dokaz da protiv njega nije pokrenut krivični postupak za krivično djelo za koje je predviđena kazna zatvora tri i više godina, izdat od nadležnog suda (ne stariji od tri mjeseca).

Javni konkurs objavljuje se u "Službenom glasniku BiH", "Službenom glasniku Brčko Distrikta BiH" i na veb-stranici Parlamentarne skupštine BiH www.parlament.ba., a u dnevnim listovima „Dnevni avaz“, „Blic“ i „Večernji list“ bit će objavljeno obavještenje o javnom konkursu.

Prijavu na javni konkurs s traženom dokumentacijom treba dostaviti najkasnije 15 dana od dana objavljivanja u "Službenom glasniku BiH", od kada će se računati i rokovi. Prijava s dokumentacijom dostavlja se poštom, preporučeno, na adresu:

Privremena zajednička komisija oba doma Parlamentarne skupštine Bosne i Hercegovine za provođenje procedure za imenovanje člana Ureda za razmatranje žalbi

**„JAVNI KONKURS
ZA IMENOVANJE ČLANA UREDA ZA RAZMATRANJE ŽALBI (u Sarajevu)
IZMEĐU STRUČNJAKA U OBLASTI JAVNIH NABAVKI, TRANSPORTA I
STRATEŠKOG POSLOVNOG UPRAVLJANJA IZ FEDERACIJE BOSNE I
HERCEGOVINE - NE OTVARATI“**

71 000 Sarajevo, Trg Bosne i Hercegovine br. 1

Napomena: Neblagovremene, nepotpune i neuredne prijave neće biti razmatrane.